



Cumün da Scuol

Dal cussagl cumünal

Departaments dal cussagl cumünal pel trienni 2012-14

Als 1. schner 2012 ha cumanzà la nouva perioda d'uffizi pellas autoritads cumünalas. Il cussagl cumünal as cumpuona sco segua (in parantesa: dicasteri): Jon Domenic Parolini, capo cumünal (finanzas, economia), Men-Duri Ellemunter, vicecapo (cultura, sandà, social), Hanspeter Dorta (aua/chanalizaziun, gestiuns technicas, pumpiers), Hans Marti (turissem, sport), Arno Ritzmann (scoula, regiun, immundizchas, protecziun civila), Jon Roner (energia, ambiant incl. forestal/agricul), Marcus Wetzel (planisaziun, fabrica, trafic).

Cumischiuns cumünalas

Il nouv trienni ha cumanzà eir pellas differentas cumischiuns cumünalas (stablas e temporaras). Ils detagls sun visibels sülla pagina d'internet dal cumün www.scuol.net.

Via Punt Lischana - Pradella

Divers proprietaris da chasas in Pradella han protestà cunter la decisiun da serrar la via da la Punt Lischana fin a Pradella pel trafic d'autos d'ürant l'inviern. Els fan valair cha lur stabiliments hajan ün access sgür be sün quista via. Els giavüschan cha'l cussagl abolischa sia decisiun.

Tenor la classificaziun dal plan general d'avertüra as tratta d'üna via champestra, q.v.d. cha'l cumün nun es in dovair da tilla tgnair averta d'ürant l'inviern. Ils chants stips da quista via sun cuvernats bleras jadas cun glatsch. La fracziun da Pradella ha l'access da la vart schnestra da l'En sur Pradella Suot. La construcziun dal passagi sur l'aual da la Triazza garantischa ün trafic circular tras Pradella.

Il cussagl ha dimena decis da restar pro sia decisiun. A man da las experienzas fattas quist inviern deciderà'l schi's voul tgnair serrà la via d'inviern eir in avegnir.

Avegnir dal kino

Las frequenzas dal kino van adüna almain, e la gestiun es deficitara fingià daspö divers ons. Il cumün ha büdschetà per quist on ün deficit da CHF 10'000.--, q.v.d. be plü ün terz da quel dals ons precedaints. Id es da far quint cha quist import saja dovrà da prümavaira.

Üna cumischiun culs duos cusgliers Hans Marti (turissem e sport) e Men Duri Ellemunter (sandà, cultura e social) sco eir Madlaina Barblan (respunsabla pel kino pro la BES SA) e Kurt Stecher (chi preschainta ils films) s'occupa culla fatschenda e preschantarà co ed in che fuorma chi's pudess cuntinuar cul kino.

Plan directiv d'abitadi

La PEB ha giavüschà al cumün da tour posiziu invers il plan directiv d'abitadi, q.v.d. da fixar tscherts cunfins stabels dal territori abità a lunga vista. Il cussagl cumünal ha determinà quels in differents quartiers surtuot vers las surfatschas cun cultivaziun alternanta [Fruchtfolgeflächen] ed invers las terrassas. L'areal da Sotruinas Dadora dess d'vantar plünavant ün'opziun per gestiuns da mansteranza surcumünalas. Sotruinas es fingià previs per quist intent.

Uorden da parcar cun vignettas

Singuls mansterans vaivan reclomà cha l'uorden saja massa restrictiv. Il cussagl ha decis per quai tscherts müdamaints, tanter oter cha la vignetta es valabla mincha di e d'ürant 24 uras e ch'ella permetta da parcar eir aint in hallas. La vignetta po gnir retratta plünavant eir per veiculs da servezzans technics e dal bön public (p.ex. Spitex e servezzan da giantars).

Taxas d'attach e d'adöver pella sarinera in S-charl

La ledscha superiura prescriba cha las taxas da chanelisaziun hajan da gnir etschüdas tenor il princip dal chaschunader. Las taxas previssas tenor preventiv pella fracziun da S-charl nu correspuondan a quist princip (las gestiuns turisticas vessan da pajar plü pac co las chasas privatas) e sun gnüdas refüsadas perquai da la radunanza cumünala da büdschet.

Il cussagl ha decis da propuoner a la prosma radunanza cumünala las seguaintas tariffas: chasas privatas pajan üna taxa fundamentala da CHF 290.-- sco previs aint il preventiv. Quai sun 70 % implü in congual cullas chasadas a Scuol. Correspuondentamaing vain augmantada la taxa fundamentala eir pellas gestiuns turisticas per 70 %. La taxa tenor quantità vain fixada per tuots a CHF 3.50 / per m³ aua consümada. Il preventiv vaiva previs CHF 8.00 per chasas privatas e CHF 2.00 pellas gestiuns turisticas.

Il reglamaint davart la chanelisaziun e la sarinera da S-charl ha da gnir adattà e vain suottamiss a la cumünanza d'urna dals 17 gün 2012.

Fermativa da l'auto da posta Belvédère

L'auto da posta ferma in avegnir davant l'hotel Belvédère sün via e na plü aint il spazi pels peduns. Quai sarà però pussibel pür cur chi'd es avant man ün automat per cumprar bigliets. Ils bus stan salda lura bler plü cuort co actualmaing siond cha'l manaschunz nun ha da vender plü ingüns bigliets. In ün seguond pass vain müdà il sistem da controlla (controlla dals bigliets tras controllörs e na plü tras il manaschunz), e quai scurznischa il temp da fermativa amo daplü.

Surdattas da lavuors

Il cussagl ha surdat las lavuors da planisaziun e direcziun da fabrica per las investiziuns dal 2012 als büros d'architectura e d'indschegner. El ha resguardà lapro tuot ils büros indigens e per lavuors specialas singuls büros d'utrò.

Dumondas da fabrica

La direcziun ha dat il seguaint permiss da fabrica:

- Regina Jenny-Lippuner: renovaziuns/restructuraziuns e cellas solaras, Pimunt, parcella 173.